

05. oktober 2016

UKA2016/121

Uunga siunnersuut: Atuarfik pillugu Inatsisartut inatsisaata allanngortinneqarnera pillugu Inatsisartut inatsisaat nr. xx, xx xx 2016-imeersoq
(Meeqqat atuarfiat pillugu angajoqqaat nuna tamakkerlugu isumalioqatigiissitaannik pilersitsineq)

Naalackersuisup saqqummiussaanut qujalluta Siumumiit ima oqaaseqarfigissavarput.

Siunnersuutip siunertaa pitsaasutut isigaarput. Ineriartortitsinissaq pitsanngoriartitsinissamik imalik imminermini pitsaasuvoq isumatusaarnertullu nalilerneqarsinnaalluni. Siumumiit meeqqat atuarfiat pillugu ima isumaqarpugut: Meeqqat angusarissaarnissaat atuarfiup angerlarsimaffiullu suleqatigiillu arnerisigut anguneqassaaq, taamaattumik angerlarsimaffiup atuarfiullu suleqatigiinnerat nukittorsartariaqarpoq.

Meeqqat atuarfiat tassaajuarpoq nunatta ineriartornissaanut matuersaatip pingaarnersaat. Ilinniartitaaneq nunatta inuisa atugarissaarnerunissaanullu aqutissiuisuvoq. Taamaattumik atuarfik pineqartillugu suliniutit siumut pitsanngorsaataasinnaasut iluatinnartutut tamatigut isigisariaqarput. Taamaakkaluortoq Naalackersuisut inatsisissatut uani siunnersuutaanni ilaatigut tikkuartarialittut taasinnaavarput ippinnartoqarlunilu allanngortitsisoqartariaqarsorinarmat, tassani pequtaalluni maanna atuarfinni suliniutit pioreersut soorlu “Skolebestyrelse” ingerlapput. Taakkulu nammineq kajumissuseq aallaavigalugu sulinertik ingerlappaat, tamatuma pitsanngorsarnissaa sooq Naalackersuisut inerisaaviginiarlugu aallartiffiginngilaat? Aappaattullu nunarput isorartooq eqqarsaatigalugu ajornartorsiutit ima siammasitsigipput sumiiffinni amerlanerpaani Kommuni iluani suliaasaqarfiit maannamut angummassinnaanatik oqallisaajualersimallutik. Taamaattumik pisariaqarluinnarpoq atuarfeqarfinni immikkut socialrådgiverimik atorfinitsitsisoqarnissaa, tamanna sakkortuumik Naalackersuisunut Siumumiit kaammattuutigissavarput.

Ukioq manna meeqqat ukiuattut suaarutigineqarpoq, taamaattumik inuiaqatigiit tamatta partiit akimorlugit suleqatigiinnissarput aatsaat taamak pisariaqartigilerpoq. Oqallinnerpassuit maannamut pioreersut nalaatereerpavut, oqallinnerinnakkulli suliaasat aaqinneqarsinnaangillat, eqqortumik naleqquttumillu aaqissuussinikkut anguniagaq timitalersorneqarsinnaavoq. Inuit tusakatappaat iluarsasseqqinnissamik oqariatuutit tusartuassallugit.

Atuarfinni immikkut isumasioqatigiissitanik Naalackersuisut pilersaarutaat aningaasarpassuarnik nassataqartumik takorluuiffiusumik pilersaaruserfigineqarpoq. Naak isuma kusanaraluaqisoq Naalackersuisulli kaammattorumavavut kommunit kivissinnaasaat maannakkut killeqareeqisut ilisimareeratsigit atuarfinni immikkut socialrådgiverimik atorfinitsitsisoqartarnissaa, taamaasilluni pitsanngorsaannissaq taassumalu nassataanik kivitseqatigiissinnaaneq annertusineqarsinnaammat.

Ukiorpassuarni ilisimavavut atuarfinni ilinniartitsisorpassuit nukippassuit atoreerlugit meeqqat pitsaanerusumik atuartinnissaannut pilersaarusiortartut. Taassumali qaavatigut meeqqat atuarfimmi malinnaaniarnerat ajoraluartumillu ilaatigut ataqqinninngittarnerat peqqutaalluni ilinniartitsisorpassuit nukissaalatsilertarput, illersorneqarnissaq annerusoq pilersinneqarsinnaavoq atuarfimmi socialr dgiverimik atorfinitsitsinikkut ilinniartitsisut suliassarinnngisaminnik ilaatigut sulilertarnerat takornartaajunnaarnikuuvoq. Isumasioqatigiit pilersinneratigut pitsaaqutaasinnaasut atorluarneqarsinnaapput, taarsiulluguli Siumumiit oqarusunneruvugut pioreersut atorluarneqarsinnaasut inerisarneqaqqullugit. Aningaasarpassuimmi pineqartillugit isumatusaarnerussaaq kivitsisinnaasumik pilersitsineq.

Naalackersuisooqatigiit anguniarpaat nunarput ilinniarsimassutsikkut imminut pilersorlunilu napatittoq. Meeqqat atuarfiata, Atuarfitsialaap nalilersorneqarnera naammassineqarpat Naalackersuisooqatigiit meeqqat atuarfiata nukittorsarneqarnissaa sulissutiginiarlugu anguniagassaliornikuupput, taamaaliornikkut sineriak tamakkerlugu angusaqassutsikkut pitsaanerusumik assigiinnerusumillu angusaqarfiunissaat qulakkeerumallugu. Tamatuma naqissuserpaa pitsanngoriartoqassappat oqimaaqatigiissaarisooqartariaqartoq, allorassaaqatigiittoqanngippammi suliassat kipusoornikkut ajalusoorsinnaanerat sillimaffigineqartariaqarmat.

Pilersaarusiortarlunissaq avaqqunneqarsinnaanngilaq.

Taamak Siumumiit isumaqarluta Kultureqarnermut ilinniartitaanermullu ataatsimiititalimut suliassanngortipparput.

Laura T un jik

Siumut